

Préface

Chères Soeurs de la Nassirat-ul-Ahmadiyya

L'islam c'est ène trésor qui Allah fine donne nous. Pour nous capave gagne banne l'avantages de ça trésor-là nous besoin étudier li, conne so valeur et mette li en pratique.

Quand le Mousleh Ma'oud^(r.a) fine mette deboute la Nassirat-ul-Ahmadiyya, c'était dans le but pour réforme banne filles de la Jamaat Ahmadiyya pour qui demain zotte vine banne musulmanes modèles dans la société. Banne classes de la Nassirat fine établi avec ça but là-même et nous pé essayé, dans le très peu de temps qui ène zenfant passé dans la Nassirat, pou donne li ène maximum de connaissance de base sur l'islam.

Nous espéré qui le syllabus qui nous fine établir pour profite à tous nous banne Nassirats. Qui Allah béni zotte avec la connaissance, la piété et la sagesse! Amine!

Nous tenir à remercier toutes celles qui fine donne zotte létemps pour prépare ça syllabus-là, Mme Yasmeen Nobee et tout so l'équipe. Qui Allah récompense zotte pou zotte banne zefforts!

Mme. Amatul Haye Jawaheer
Sadr Lajna de l'Ile Maurice
Janvier 2014

CONTENTS

1ST TERM- JAN TO APRIL

1. Les attributs d'Allah
2. Le but de la vie
3. Vivre simplement ou Qana'at
4. Compagnons du Saint Prophète^(s.a.w)
5. La vie du Mousleh Maoud^(r.a)
6. Sacrifice financier
7. Garde ou promesse
8. La vie du Messie Promis^(a.s)
9. Obéissance au Nizame Jamaat
10. Que veut dire Purdah ?

2ND TERM- MAY TO AUG

11. Hygiène personnelle
12. La vie du Saint Prophète^(s.a.w)
13. Compagnons du Saint Prophète^(s.a.w)
14. Devoirs envers les parents
15. Comportement dans la société
16. Prend garde à la jalousie
17. Prend garde à la jalousie
18. L'amitié et la fraternité
19. Pas faire *ghibat* ou back biting
20. La reconnaissance

3RD TERM- SEP TO DEC

21. Etiquette quand visite ène malade
22. Compagnons du Saint Prophète^(s.a.w)
23. Banne intoxicants ou drogues
24. Respect pour les morts
25. Respect pour les morts
26. Bonne compagnie
27. Compagnons du Saint Prophète^(s.a.w)
28. Amânat ou confiance
29. La Patience
30. Écrire à Huzour Aqdas

DOAHS

AGE GROUP 12 YRS

1ST TERM

1. Revision of previous lessons
2. Doah After Salat: (PM* pg. 31)
 - (a) Soubhan Allah ... with translation
 - (b) Lâ ilâhâ il lallâho wahdahou... with translation
3. First 5 verses of Surah Baqarah

2ND TERM

4. Revision of previous surahs
5. 6th to 10th verse of Surah Baqarah
6. Surah At-Tin (PM* pg. 59)

3RD TERM

7. Innalillahi Wa Inna lllayhi Rajioune with translation
8. Rabbanaa laa touzigh qouloubanaa ... (PM* pg. 67) with translation
9. Pour gagner du succès et avoir la tâche facile (PM* pg 86)
10. Rabbana atena milladounka ... with translation

(*PM: *La Prière Musulmane*)

AHAD : AFFIRMATION DE FOI
Nassiratul Ahmadiyya

Ash-hadou allaa ilaaha illallaahou /
wahdahou laashariika lahou /
wa ash-hadou anna /
mouhammadan 'abdouhou /
wa rasoulouhou.

أَشْهَدُ أَنْ لَا إِلَهَ إِلَّا اللَّهُ
وَحْدَهُ لَا شَرِيكَ لَهُ
وَأَشْهَدُ أَنَّ
مُحَمَّدًا عَبْدُهُ
وَرَسُولُهُ

Mein waada karti houn /
Ké dîné islaam aur ahmadiyyat kaum /
Aur watan ki khidmat karné ké liyé /
har dam tayaar rahoungi.
Hamésha satch boloungi /
Aur Hazrat Khilaafatul Massih /
ké tamaame houkmon par /
amal karné ki koshish karoungi /
Insh'Allah

میں وعدہ کرتی ہوں
کہ دین اسلام اور احمدیت قوم
اور وطن کی خدمت کرنے کے لئے
ہر دم تیار رہوں گی
ہمیشہ سچ بولوں گی
اور حضرت خلیفۃ المسیح
کے تمام حکموں پر
عمل کرنے کی کوشش کروں گی

انشاء اللہ

Traduction :

Mo attesté qui péna personne digne d'être adoré à part Allah, Li Ène ;
Li péna partenaire et mo attesté qui Mohammad(s.a.w) li So Serviteur
et So Messager

Mo promesse qui mo pou toujours prête pou servi la religion Islam, la
communauté Ahmadiyya, et mo pays. Mo pou toujours cause vrai. Et
mo pou faire de mo mieux pour obéir à tous banne l'ordres de Hazrat
Khalifatul Massih. Insh'Allah.

1ST TERM- JAN TO APRIL

1. Les attributs d'Allah

Dans Quran dire:

« Et pou Allah-Même tous banne joli noms (attributs parfait), alors appelle-Li par ça banne noms-là. » (7 :181)

Voici encore cinq autres attributs d'Allah qui nous besoin servi quand nous pé adresse Allah dans nous doah :

الْعَظِيمُ	Al-'Aziime	Celui Qui bien Grand
الْغَفُورُ	Al-Ghafoor	Celui Qui bien Pardonnant
الْحَفِيظُ	Al-Hafiiz	Le Gardien
الْكَرِيمُ	Al-Kariime	Le Noble
الْوَدُودُ	Al-Wadood	Celui Qui rempli d'affection

2. Le but de la vie

Allah Li le Créateur et Maître de tous banne créatures et tous ça qui existé dans l'Univers. Alors Li tout seul conné qui faire Li fine créé nous. Dans Quran Allah dire :

« *Et Mo pas finne créé banne djinns et banne dimounes mais pou ki zotte adore Moi.* »(51 :57)

D'après l'Islam, Allah fine créé banne dimounes pou qui nous comprend banne qualités d'Allah et qui nous adore Allah et nous soumette nous complètement à tous So banne l'ordres. Nous capave arrive à ça but-là si:

- (1) Nous croire fermement dans les six articles de foi
- (2) Nous pratique les cinq piliers de l'Islam
- (3) Nous amène ène la vie pure avec banne bon morales et nous vine banne bon dimounes dans la société et qui apporte aide pour le bien-être de la société.

Dans so livre, ‘The Philosophy of the teachings of Islam’, Hazrat Ahmad^(a.s) fine écrire:

“Li evident qui le but plus important c’est la rencontre avec Allah. De ce fait, but de la vie c’est qui nous le cœur besoin toujours ouvert à Allah l’Exalté. » c’est-à-dire qui nous besoin toujours rappelle qui le plaisir d’Allah passe avant tous quitte choses et tous nous banne actions besoin en obéissance à banne l’ordre qui Allah fine donné dans Quran. Ainsi nous pou soumettre nous complètement à Allah et nous désire seulement ça qui Allah content. Et nous pou capave gagne la paix intérieure.

Devoirs envers nous prochains

Allah pas accepter So adoration sans qui nous porte attention à nous devoirs envers banne dimounes qui autour nous.

Nous devoirs envers nous prochains basé lor banne sources suivants :

- Le QURAN : qui est ène livre révélé de Dieu et qui contenir banne là-lois qui guide dimounes dans le droit chemin.
- Le SUNNAH (la pratique): qui est l’exemple de la pratique du Saint Prophète^(s.a.w) pou démontrer banne principes et enseignements du Quran.
- Les HADITHS (les dire): qui est la parole du Saint Prophète^(s.a.w) et servi li comment ène témoignage du sunnah qui est la pratique du Saint Prophète^(s.a.w).

Résumé de banne principes de conduite morale et sociale :

(i) L’Amour pou ou Prochain

Les droits de banne dimounes li aussi important qui banne droits d’Allah. Le Saint Prophète^(s.a.w) fine dire : « Celui qui pas éprouve de la pitié pou so prochain, Allah pas pou éna pitié lors li. »

(ii) Suivre banne Attributs d’Allah

Nous besoin essaye suivre banne attributs d’Allah dans nous la vie de tous les jours. Par exemple Allah Li très Gracieux. Nous aussi dans ène certaine mesure nous capave montré ça qualité-là dans nous quand nous aide banne

pauvres ou banne qui plus faibles. So résultat c'est ki nous pou profite de banne attributs d'Allah nous aussi par la suite. Par exemple si nous pardonne nous prochain, Allah pou pardonne nous aussi. Si nous cachiète péché de nous camarade Allah pou cachiète nous péché aussi.

(iii) L'Exemple Noble du Saint Prophète ^(s.a.w)

« En vérité dans Prophète d'Allah zotte éna ène excellent modèle. » (Quran 33 :22)

Allah dire nous qui le Saint Prophète^(s.a.w) li ène modèle parfait pour tous banne dimounes. Si nous suivre so l'exemple, nous pou définitivement gagne banne bon qualités moral et nous pou marche lor tous banne enseignements du Saint Coran.

3. Vivre simplement ou Qanaa'at

1. Hazrat Abou Huraira^(r.a) rapporter qui Hazrat Mohammad^(s.a.w) fine dire: 'Vine Muttaqui, c'est lers-là qui ou pour vine plus grand adorateur d'Allah. Adopter Qanaa'at, c'est lers-là qui ou pour vine plus reconnaissant. Désire pour les autres dimounes c'est qui ou désirer pour ou même, c'est lers-là qui ou pour vine ène vrai croyant. Traite ou voisin dans ène bon façon, c'est lers-là qui ou pour vine ène vrai musulman. Pas rier beaucoup, parce qui quand ène dimoune rier beaucoup, so le coeur pour mort.'

2. Huzour(a.t.b.a) dire : Qanaa'at li important, parce qui c'est Qanaa'at même qui pour faire ou vine reconnaissant. Et Allah dire qui quand ou vine reconnaissant envers Li, Li pour envoie encore plus faveurs lors ou. Le travail de ène croyant, c'est pour faire so travail avec efforts, li besoin servi tout moyens qui à so disposition, ensuite li contente li et satisfaire li de c'est qui li fine gagner et dire *Alhamdollilah*. Si li faire comme ça, alors Allah pour envoie tellement bénédiction lors li qui li même li pour étonner.

3. Dans ène Hadith, Hazrat Mohammad^(s.a.w) fine dire: 'Pour dépenser avec modération, c'est la moitié de la vie. Et pour traite banne dimounes avec

l'amour, c'est la moitié de l'intelligence. Et pour pose ène question dans ène bon façon, c'est la moitié de la connaissance.' Huzoor(a.t.b.a) dire: D'après Hazrat Mohammad^(s.a.w), quand ou pour éna la modération, et pour garde ène contrôle lors banne dépenses, alors ou pé accompli la moitié de ou banne besoins.

4. Ensuite, Hazrat Mohammad(s.a.w) fine dire: 'Celui qui tellement en difficulté qui so provision suffit à peine pour li, mais qui malgré ça, li montrer de l'obéissance, alors li fine gagne le salut. Et Allah fine donne li Qanaa' at.'

5. Hazrat Mohammad^(s.a.w) fine dire: 'Si le fils d'Adam éna ène vallée rempli d'or, là-aussi li pour envie gagne ène l'autre vallée rempli d'or. Et c'est seulement la terre qui pour capave rempli so la bouche. Et Allah accepter la repentance de banne qui repentir.' Huzoor(a.t.b.a) dire: Hazrat Mohammad^(s.a.w) fine décrire banne dimounes qui pas montrer Qanaa' at. Li dire qui ène dimoune rempli d'avidité et de gourmandise, tout le temps li pour envie gagne tout c'est qui éna dans le monde, mais là-aussi li pas pour assez, tous les temps li pour envie gagne encore. Et tant qui li vivre, ça l'avidité et gourmandise-là pour amène li vers l'enfer. Autant ène dimoune avide, autant même li reste souffert. Ène croyant besoin protège li contre ça banne affaires-là. Et si jamais li gagne ça banne pensées-là, li besoin tourne li et courbe li vers Allah, afin qui li purifier li-même. Si ène dimoune courber devant Allah en toute sincérité, et qui li repentir et demande pardon, alors Allah pour accepter so pardon.

6. Hazrat Sheikh Yacoud Saheb Irfani^{ra} ti accompagne Hazrat Massih Ma'oud^(a.s) au cours ène débat à Amritsar. Li dire:

'Hazrat Massih Ma'oud^(a.s) ti allonger lors ène simple tapis. Tapis-là ti tellement courte, qui genoux jusqu'à li pieds de Hazrat Massih Ma'oud^(a.s) ti lors la terre. Mais Hazrat Massih Ma'oud^(a.s) ti pé allonge lors-là, en toute simplicité et sans aucun formalité. Hazrat Sheikh Yacoud Saheb Irfani^{ra} dire: Mo pas capave dire qui ti pé passe dans moi quand moi et celui qui ti avec moi-là nous fine trouve ça. Mo fine rappelle ça incident côte Hazrat Mohammad^(s.a.w)

aussi ti pé alonge lors ène tapis et quand li fine lever, so banne compagnons fine trouve trace de ça tapis-là lors so le corps béni. Banne compagnons fine dire li: ‘O Prophète d’ Allah, est-ce qui ou envie qui nous amène ène matelas pour ou?’ Hazrat Mohammad^(s.a.w) fine réponde: ‘Qui mo besoin avec ça le monde-là? Mo relation avec ça le monde-là, li pareil comment ène voyageur qui fine arrête sous ène arbre pour prend repos. Après ça li éna pour quitte ça place de repos-là pour alle vers so destination.’ Hazrat Sheikh Yacoud Saheb Irfani^(r.a) dire: Mo rapelle ça bien, qui Mian Ala Diin Saheb fine demande Hazrat Massih Ma’oud^(a.s): ‘Est-ce qui ou envie qui mo mette ène drap?’ Hazrat Massih Ma’oud^(a.s) fine réponde: ‘Non, mo pas fine allonger pour dormi. Si prend repos dans travail, alors c’est travail-là qui pour souffert. Et aujourd’hui c’est pas ène jour pour reposer.’

(Khutba du 30 avril 2004)

4. Les Compagnons du Saint Prophète^(s.a.w)

Le Saint Prophète^(s.a.w) fine dire :

« Mo banne compagnons zotte coumma banne zétoiles. Zotte pou guidé sur le droit chemin si zotte suive ène parmi zotte. »

Banne compagnons du Saint Prophète^(s.a.w) c’est banne ki fine trouve li, ki fine gagne l’occasion pou vivre dans so compagnie et ki fine morts en musulmans. Pou ça banne compagnons-là, le Saint Coran dire dans chapitre 5 verset 120 :

« **Allah Li Satisfait are zotte et zotte satisfait are Li** »

Hazrat Bilal^(r.a)

Bilal^(r.a) ti ène esclave abyssinien. Li ti accepté l’Islam depuis commencement. Quand li fine converti à l’Islam, li fine subir beaucoup mauvais traitements. Celui ki fine faire li plus souffert, ti so maître, Omayya. Li ti pé faire li dormi sans chemise lor du-sable brûlant dans désert et ti pé force li pou dire ki so

BonDieu c'est Lat et Uzza ki ti deux idoles et ki li besoin adore zotte. Mais Bilal^(r.a) ti reste ferme dans so la foi et li ti récite « Ahad ! Ahad ! » ki veut dire « Allah Li ène ! Allah Li ène ! » Le Saint Prophète^(s.a.w) fine tende triste nouvelle de banne tortures ki ti pé inflige li et le Prophète^(s.a.w) ti envie acheter Bilal^(r.a) pou li libère li. Quand Hazrat Abu Bakr^(r.a) fine tende ça, li fine aussitôt alle côte Ommaya et fine acheter Bilal^(r.a) et fine libère li.

Hazrat Bilal^(r.a) ti éna ène la voix bien fort et mélodieuse. Quand fine institué le système de Adhan – l'appel à la prière, Hazrat Bilal^(r.a) fine gagne l'honneur pou être le premier Muezzin de l'Islam c'est-à-dire li fine vine le premier pou donne l'Adhan. Li ti éna l'habitude pou donne Adhan dans masjid du Saint Prophète^(s.a.w), mais quand le Prophète^(s.a.w) fine mort, li fine arrête donne Adhan par tristesse. En l'année 16 de l'Hégire, quand le deuxième Calife de l'Islam, Hazrat Umar^(r.a) ti en voyage en Syrie, il fine exprime le désir ki Hazrat Bilal^(r.a) donne Adhan et appelle banne fidèles à la prière. Hazrat Bilal^(r.a) fine accepter et partout nouvelle-là fine fané ki Hazrat Bilal^(r.a) pou donne Adhan pou la prière du matin. Banne dimounes fine précipite vers la mosquée pou écoute ça la voix ki ti arrêter-là et ki pou résonner encore ène fois. Banne les zautres compagnons fine émus jusqu'au larmes quand zotte fine tende Bilal^(r.a) donne Adhan car li rappelle zotte l'époque côte le Saint Prophète^(s.a.w) ti encore vivant.

Hazrat Talha Bin Abdullah^(r.a)

Talha^(r.a) ti ène parmi ça dix compagnons ki ti annonce zotte ki zotte pou rentre dans Paradis.

Talha^(r.a) ti bien courageux et très loyal envers le Saint Prophète^(s.a.w). Pendant la bataille d'Uhud, quand banne infidèles ti pé envoye banne flèches lor le Saint Prophète^(s.a.w), Talha^(r.a) fine déboute devant le Saint Prophète^(s.a.w) pou protège li. So lécorps fine recevoir plusieurs blessures et ène la main fine handicapé à jamais. Plus tard quand banne Sahabis fine demande li : « Est-ce ki to pas fine réssenti aucun douleur ? » Talha^(r.a) fine réponne : « Bien sûr

ki mo fine souffert, mais mo ti peur pou rétire mo la main attention ki ène flèche blesse le Saint Prophète^(s.a.w). »

5. La vie du Mousleh Maoud^(r.a)

(10) L'assemblée consultative à (13) Exode de Qadian

6. Sacrifice financier

1. Dans Quran Allah dire :

« Jamais zotte pou obténir la piété à moins ki zotte dépense dans ça *banne quiquechoses* ki zotte *bien* content. Et n'importe ça ki zotte dépensé Allah conne ça bien. » (3 :93)

2. Hazrat Khalifatul Massih Awwal^(r.a) dire: Dans premier ruku' de Surah Baqarah, Allah dire qui banne *muttaqui* c'est banne qui dépense de ce qui Allah fine donne zotte. Ensuite dans ça même Surah-là, Allah fine mette encore plus l'emphase lors dépense dans So chemin. Ensuite Allah dire: 'Et jamais ou pas pour capave atteindre vrai droiture tant qui ou pas dépense depuis ou l'argent.' Hazrat Khalifatul Massih Awwal^(r.a) dire: D'après moi 'dépense depuis c'est qui ou content le plus' veut dire dépense depuis ou l'argent. Parcequi dans Surah Al-'Aadiyaat verset 9 Allah dire concernant l'homme: 'L'homme follement amoureux de la richesse.' Donc pour atteindre la vrai droiture ou besoin dépense meilleur partie de ou du-biens pour la cause d'Allah.'

3. Dans ène Hadith Hazrat Hassan^(r.a) rapporter qui Hazrat Mohammad^(s.a.w) fine dire: 'Allah dire: 'O Fils d'Adam, garde to trésor côte Moi pour qui to gagne tranquillité. Côte Moi, péna danger qui li pour brûler par du feu. Péna danger qui li pour perdi dans de l'eau. Et péna danger qui voleur pour vine coquin li. Mo pour retourne toi ça trésor-là jour côte to pour besoin ça le plus.' Huzoor(a.t.b.a) dire: 'Ça c'est ène transaction bien facile.

4. Aujourd'hui c'est seulement banne Ahmadi qui comprend et conner côte

pour garde zotte trésor. C'est seulement banne Ahmadi qui comprend ça verset côte Allah dire: 'Allah pour retourne tout c'est qui ou fine dépenser dans So chemin et Li pas pour traite ou injustement.' Allah dire nous façon qui Li pour retourne ça. Li pour retourne ou complètement tout c'est qui ou fine dépenser dans So chemin. Dans les autres places Li fine même dire qui Li pour augmente ça du-biens-là et pour retourne ou ça. Même si ou comprend ça ou pas, mais certainement Li pour retourne ou ou du-biens qui ou fine dépenser pour So cause.

5. Parce qui ou pas conner qui faute ou soi qui manquement qui ou capave commettre. Mais si ou fine dépense dans So chemin en toute sincérité ou pour éna ça garanti-là qui si jamais éna quique manquement dans ou banne actions, alors jamais pas pour traite ou injustement parce qui ou fine dépense dans le chemin d'Allah. C'est qui ou fine dépenser-là pour compense ou banne manquement et pas pour traite ou injustement.

6. Hazrat Mohammad^(s.a.w) fine dire: 'Pas besoin jaloux personne à part deux dimounes. Éne là-dans c'est celui qui Allah fine donne li l'argent et li dépense ça dans le chemin d'Allah. Deuxième c'est celui qui Allah fine donne li connaissance, compréhension et la sagesse, à travers lequel li ranne jugement entre banne dimounes et li enseigne banne dimounes.'

(Extraits de Khutba Jummah 09-01-2004)

7. Garde ou promesse

H. Abu Huraira^(r.a) rapporter qui Hazrat Mohammad(s.a.w) fine dire qui ène hypocrite éna 3 caractéristiques. Quand li causer li cause menti, quand faire li confiance li trahir ou confiance, et quand li faire promesse li casse so promesse.

Etiquettes de promesse

1. Accomplir ou promesse. Pas alle contre accomplissement de ou promesse sans aucun raison valable.

2. Pas faire banne promesse sans réfléchir
3. Pas faire banne promesse qui ou pas éna l'intention pour accomplir.
4. Si ou fine promette ène zenfant ène quiquechose, ou besoin accomplir ou promesse. Dans ène hadith rapporter qui devant Hazrat Mohammad^(s.a.w) ène maman fine dire so zenfant : « Vini mo pou donne toi ène quittechose. » Hazrat Mohammad^(s.a.w) fine demande maman-là : « Qui ou éna l'intention pou donne li ? » Maman-là fine réponde : « Quelques dattes. » Hazrat Mohammad^(s.a.w) fine dire alors qui si li pas ti donne li quittechose, ça ti pou compte comme ène mensonge.

8. La vie du Messie Promis^(a.s)

(16) Le Miracle de l'écriture à (20) La mort de Lekhram

9. Obéissance au Nizame Jamaat

1. Le niveau et vitesse de progrès de chaque peuple et de chaque Jama'at li dépanne largement lors niveau de obéissance de so banne membres. N'importe quand pour éna ène baisse dans obéissance bé progrès aussi pour diminuer.
2. Et pour banne Jama'at divine non seulement éna ène diminution dans vitesse de progrès mais éna aussi ène baisse dans niveau de la spiritualité. C'est pourquoi dans le Quran Allah fine explique le sujet de obéissance beaucoup des fois. Et dans different façon fine conseille banne croyants qui ou obéissance dans Allah pour compter seulement quand ou éna obéissance pour le Messager^(s.a.w).
3. Parfois fine mentionner à banne croyants qui le niveau de zotte pardon li dépanne lors zotte obéissance à Allah et à So Messenger et besoin mette tout banne instructions en pratique lers-là qui pour éna le pardon.
4. C'est seulement quand ou obéissant c'est lers-là qui capave dire qui ou fine commence marche lors chemin de Takwa. Et fine dire ki quand ou

pour augmente le niveau de ou obéissance bé à ce moment-là ou pour hérite Mo banne paradis.

5. Allah So la main lors Jamaat, c'est ça même le secret, Allah content l'unité et ça li pas possible tant qui pas éna l'obéissance. Dans l'époque de Hazrat Mohammad^(s.a.w), banne sahabas ti éna banne bel bel l'opinions. Allah ti mette ça dans zotte. Zotte ti conne principe de la politique aussi. Parce qui à la fin quand H.Abu Bakr^(r.a) et H.Umar^(r.a) ti vine Khalifa, zotte fine gagne banne royaumes. Beauté avec lequel zotte fine dirige banne royaumes-là prouver qui quantité zotte ti capable. Mais devant Hazrat Mohammad^(s.a.w), situation ti tel qui quand li ti dire quiquechose zotte tous ti obéir. Zotte efface zotte propre l'opinion. Si pas ti éna obéissance et chacun ti considère so propre pensée, zotte pas ti pour gagne aucun succès.

6. Encore besoin banne tels qualités dimounes comment ça banne sahabas-là. Parce qui ça Jamaat qui Allah pé préparer à travers la main de Massih Maoud^(a.s), Li fine inclure li avec ça même Jamaat qui Hazrat Mohammad^(s.a.w) ti préparer-là. Et parce qui Jamaat so progrès li vine avec banne l'exemples de banne tels dimounes, donc zotte qui considère zotte dans ça Jamaat-là et envie joinne Jamaat de Hazrat Mohammad s.a.w, créer ça couleur de Hazrat Mohammad^(s.a.w) dans zotte. Si éna l'obéissance, obéir comment zotte, si éna l'amour et la force, qui l'amour et la force pareil comment pou zotte, dans chaque situation vine pareil comment banne sahabas.

7. Quand éna banne désaccords bé necque besoin refère ça à Allah et So Messenger, c'est-à-dire qui besoin consulter le Quran et Hadiths. Donc ça veut pas dire qui en cas de désaccords chacun commence faire so propre commentaire et tire so propre conclusions.

8. Hazrat Mohammad^(s.a.w) fine dire qui celui qui trouve ène affaire qui pas bon dans so dirigeant, be li besoin prend patience parcequi celui qui détache li de l'organisation (de Jamaat) bé so la mort pour ène la mort de l'ignorance.

(Extraits de Khutbah Jummah 27/08/04)

10. Que veut dire *Purdah* ?

1. Huzoor(a.t.b.a) dire: ‘Si tout dimoune commence explique *pardah* dans façon qui zotte envie, le *pardah pou* népli éna so sainteté. A cause ça même qui maman-papa besoin attirer l’attention de zotte ti fille vers le *pardah*. Ça li ène responsabilité qui repose lors tous les deux parents. Ène madame de l’Europe fine écrire moi qui côte li travail li besoin mette ène uniforme qui dans forme ène **jeans** et chemise, à part ça pas gagne droit pou porte nanrien d’autre. Est-ce qui li gagne droit pou mette ça et travail? La reponse qui mo fine donner c’est qui si capave mette ène longue **coat** avec ène horni lors la tête alors ou pou capave travail là-bas, sinon ou besoin quitte ça travail-là.

2. Qui faire li important pou couvrir le visage? Hazrat Mousley Ma’oud^{ra} fine explique ça en référence avec ène hadice de Hazrat Mohammad^{((s.a.w))}. Ène fois Hazrat Mohammad^(s.a.w) fine envoie ène sahabi pou aller guetter ène ti fille pou son mariage. Sahabi-là ti éna pou aller guetter son visage. Si pas ti éna l’ordre pou couvrir le visage, tout dimoune ti pou capave trouver visage de ça ti fille-là.

3. Ène fois quand Hazrat Mohammad^(s.a.w) ti pé assise pou l’*tékaaf* li fine aller quitter Hazrat Safiyya^{ra}. Et lors la route li fine joindre deux hommes. Hazrat Mohammad^(s.a.w) fine découvrir le visage de Hazrat Safiyya^{ra} et fine dire zotte qui c’est Safiyya ça, attention qui Satan pas aller attaquer zotte et zotte commence mettre fausses allégations. Donc éna l’ordre pou couvrir le visage pou *pardah*. Hazrat Mousley Ma’oud^{ra} dire: ‘Certain dimoune dire qui Islam pas fine dire pou couvrir le visage, mais Qur’an dire pou cacher beauté. Et quelque chose qui concerne la beauté c’est le visage. Si pas couvrir le visage alors qui ça beauté qui fine dire besoin couvrir-là. Nous accepter qui pas besoin couvrir le visage dans ène telle façon qui ça capave affecter son la santé. Par exemple capave servir ène la toile léger ou soit capave faire comment banne madame arabe qui servi ène *Niquaab* qui faire qui zotte li yeux et nez reste découvert. Mais de toute façon besoin faire *pardah* du visage. Hazrat Mousley Ma’oud^{ra} dire: Banne madames qui fine atteindre la

vieillesse et qui pas pou alle faire *nikah*, zotte capave délaisse ène partie de ça **pardah**-là. Mais zotte pas besoin mette ène tas bijoux et sorti avec maquillage.

4. Ensuite éna ça coutume-là dans certain familles qui zotte vine devant tout qualité serviteurs sans aucun **pardah** et ouvertement. A part si li concerne banne serviteurs ou soit banne garçons qui fine grandi dans la case-là depuis l'enfance, ou soit banne tel serviteurs qui tellement âgé qui zotte pas pou guette avec ène mauvais regard ou soit banne qui pas pou cause du tout de ça qui pé passer dans la case en dehors avec banne étrangers, à part ça banne dimounes-là, besoin faire **pardah** avec tout qualité travailleurs et serviteurs la case.

5. Hazrat Mohammad^(s.a.w) fine dire: 'Le feu de l'enfer li interdit pou ça li yeux qui baisser pou pas guette banne affaires qui Allah fine interdit pou guetter. Et le feu de l'enfer li interdit pou ça li yeux qui fine perdi pou la cause d'Allah-là.' Banne qui baisse zotte regard zotte pou gagne même stage qui banne qui faire *djihaad* dans le chemin d'Allah, banne qui *Shahid* et banne qui passe zotte lé temps dans l'adoration.

6. Oumoul Mo'minine Hazrat Oummé Salma^{ra} rapporter qui li ti avec Hazrat Mohammad^(s.a.w) et Maymouna aussi ti avec nous. Ça ti après qui ti fini gagne l'ordre pou faire **pardah**. Ibn Ummé Maktoum fine vini. Et Hazrat Mohammad^(s.a.w) fine dire tous les deux madames pou faire **pardah**. Banne madames-là fine dire: 'Est-ce qui li pas aveugle? Ni li capave trouve nous, ni li capave reconnaître nous.' Hazrat Mohammad^(s.a.w) fine dire: 'Est-ce qui zotte tous les deux aussi aveugle? Est-ce qui zotte pas trouve li?' (Donc banne madames aussi besoin baisse zotte regard.)

(Extraits de Khutba 30-01-2004)

2ND TERM- MAY TO AUG

11. Hygiène personnelle

Banne les autres pratiques ki le Saint Prophète^(s.a.w) ti pé observer concernant hygiène so lécorps, c'est ki li ti mette de l'huile et peigne so cheveux après so bain. Et le Saint Prophète^(s.a.w) dire quand mette de l'huile dans cheveux, commence par le front car li soulage banne maux de tête.

Li ti pé coupe so banne zongles la mains et li pieds courte et propre. Dans ène hadith rapporter ki le Saint Prophète^(s.a.w) finne dire ki éna certains ki cherche ène rapprochement avec Allah, cependant zotte laisse zotte zongles pousser couma banne griffes zoiseaux et ki rempli avec tous qualité saleté et malpropreté.

Enlève banne poils en plus en bas lé bras et côte banne partie privés, car le Saint Prophète^(s.a.w) finne dire banne ki pas rase banne poils en plus, pas coupe zotte zongles et moustaches propres, zotte pas parmi nous.

Le Saint Prophète^(s.a.w) ti pé servi parfum après chaque bain. Li recommandé ki banne musulmans garde zotte vêtement propre.

Quand ène musulman suivre l'hygiène islamique coumma besoin, li gagne deux l'avantages. ène la propreté extérieur aide li pou gagne ène propreté intérieur et li pas donne ni attrappe banne maladies.

Si ène jeune fille gagne so période li pas faire Namaz pendant ça période-là. Après li besoin prend ène bain complet (lave cheveux tout) avant faire Namaz.

Li gagne droit alle masjïd pou banne programme même quand li pas faire Namaz mais li besoin prend tout so précaution pou pas sale masjïd et pas assize devant ou entre banne dimounes qui pé faire Namaz. Li besoin aussi garde li propre pendant qui li gagne so période. Change pad souvent, pas garde so pad plus qui six heures sans changé, lave so banne underwear propre.

Éne tifille besoin aussi change so underwear au moins deux fois par jour et lave so banne underwear li-même. Li besoin aussi enlève banne poils qui

trouve sous so les bras et côte so partie privée tous les semaines.

12. La vie du Saint Prophète^(s.a.w)

(11) Traité Houdaïbya à (13) La chute de Khaïbar

13. Les Compagnons du Saint Prophète^(s.a.w)

Hazrat Abu Houraira^(r.a)

Li ti ène habitant de Yémen. So vrai nom ti Umaira, mais ti pé appelle li Abu Houraira^(r.a) parce ki li ti éna ène chatte. Après ki li fine embrasse l' Islam, li fine oulé vivre en compagnie du Saint Prophète^(s.a.w) pou ki li tende li le plus souvent possible. Parfois li ti pé passe banne journées entière sans nourriture. Si quelqu' un donne li manger, li ti pé accepter avec lé-cœur content mais jamais li pas ti pé talle so la main pou demande quelque chose.

Hazrat Abû Huraira^(r.a) raconté qui ène fois li ti reste sans manger pendant plus de trois jours ; li fine vine à l' entrée de la mosquée et li trouve Hazrat Abû Bakr^(r.a) qui ti pé passe par-là. Li fine demande li la signification de ène verset du Saint Coran qui dire qui besoin nourri banne pauvres. Hazrat Abû Bakr^(r.a) fine explique li et fine aller. Hazrat Abû Huraira^(r.a) ti comprend ça verset du Saint Coran-là mais so but c' était qui quand li demande signification de ça verset-là c' est pour faire Hazrat Abû Bakr^(r.a) deviné qui li pé gagne faim et qui li donne li manger. Peu après, Hazrat 'Umar^(r.a) fine passe par là et Abû Huraira fine demande li la même chose. Hazrat 'Umar^(r.a) également fine explique li et li fine aller. Hazrat Abû Huraira^(r.a), comme tous les compagnons du Saint Prophète^(s.a.w), pas ti content faire ène demande directe et, quand li trouver qui li pas fine capave attirer zotte l' attention lor so condition, li fine senti li très faible. Alors, li fine tende ène la voix douce et tendre appelle li. Li trouve le Saint Prophète ti pé appelle li par ène la fenêtre de so la case et li ti pé sourié. Hazrat Mohammad^(s.a.w) ine demande Abû Huraira^(r.a) : « To pé gagne faim ? » et li fine réponde « En vérité, ô messager d' Allah ! Mo faim. »

Le Saint Prophète^(s.a.w) dire : « Pas éna narien pour manger côte nous, mais ène dimoune fine fecque amène ène bol du lait. Alle dans masjid pour guetter si éna encore les autres qui pé faim coumma toi. » Hazrat Abû Huraira^(r.a) en allant pé penser qui li pé gagne tellement faim qui li ti capave boire tout ça du-làit là li tout seul mais qui li besoin écoute l'ordre du Prophète^(s.a.w). Ti éna six personnes qui fine retourne are li côte le Saint Prophète^(s.a.w). Le Saint Prophète^(s.a.w) fine remette bol du lait-là dans la main de celui qui ti à so droite et fine dire li boire. Quand li fine fini, li fine dire li boire encore et encore ène deuxième et troisième fois, jusqu'à ce qui so ventre fine rempli. De la même façon pour chacun li fine dire zotte boire jusqu'à qui zotte ventre plein. Chaque fois qui le Saint Prophète^(s.a.w) ti demande à quelqu'un pour boire, Hazrat Abû Huraira^(r.a) pé gagne tracas qui attention qui reste ène tiguitte même pour li.. Quand tous les six fine fini boire du lait, le Prophète^(s.a.w) fine donne bol-là à Hazrat Abu Houraira^(r.a), et li fine trouver ki bol-là encore plein. Le Saint Prophète^(s.a.w) fine demanne li pou boire et li fine boire impé et le Saint Prophète^(s.a.w) fine dire li boire encore, li fine boire encore et rende bol-là au Saint Prophète^(s.a.w), le Saint Prophète^(s.a.w) fine redire li boire encore, alors Hazrat Abu Houraira^(r.a) dire : « O Messenger d'Allah, du lait pé sorti par mo banne lé doigts. » expression ki veut dire qui so ventre fine bien rempli. Alors le Saint Prophète^(s.a.w) fine prend bol-là et fine boire le reste.

14. Devoirs envers les parents

1. “Éne dimoune ti vine demande permission au Saint Prophète^(s.a.w) pour joine ène expédition (pour défanne l'Islam). Le Saint Prophète^(s.a.w) fine demande li si so parents encore vivant. Li fine réponne : « Oui. » Alors le Saint Prophète^(s.a.w) fine dire li : « Alors occupe-toi de zotte ; li suffisant pour toi si to faire ça. »

2. Ène Ansaar fine demande le Saint Prophète^(s.a.w) : « Est-ce qui mo éna devoir envers mo parents après zotte la mort ? Le Saint Prophète^(s.a.w) fine réponne : « Biensûr que oui. Dans quatre façons : to besoin prier qui Allah

pardonne zotte et envoye So bénédictions lors zotte, continué faire travail qui zotte ti pé entreprendre (comme la charité, sacrifice financier, etc), honore zotte camarades et renforci banne liens de parenté qui fine créé à travers zotte. C'est ce qui nous doit zotte. »

3. Le Saint Prophète^(s.a.w) fine dire : « C'est ène péché grave pour ène dimoune dire banne gros mots à so parents. Ène dimoune fine demandé : « Est-ce qui ène dimoune capave abuse so parents ? » Le Saint Prophète^(s.a.w) fine réponne : « Oui. Si ène dimoune abuse papa de ène l'autre dimoune, en retour ça dimoune-là pour abuse so papa ; et pareillement si ène dimoune abuse maman de ène l'autre dimoune, en retour ça dimoune-là pour abuse so maman. »

Huzour(a.t.b.a) dire dans so Khutba Jummah du 04 juillet 03 :

« Banne enfants besoin faire bien attention. Concernant du-biens ou soit les autres affaires, parfois certains enfants deboute devant parents sans aucun manière ni respect. Beaucoup dimoune mentionne ça banne incidents effrayants-là dans zotte lettres. Dans ça cas-là ça enfants-là besoin garde en vue ça enseignement de Hazrat Mohammad^(s.a.w) cotte li fine mette l'emphase lors bon traitement de maman. Et li fine dire qui celui qui mérite ou bon traitement le plus c'est ou maman. Et Qur'an aussi fine donne l'ordre qui pas besoin faire “*Ouf*” avec banne parents. Cela veut dire qui si ou penser qui pé coquin ou droit ou soit qui ou parent pé faire l'injustice avec ou, là-aussi ou péna droit lève la voix avec zotte. Personne pas ti pour content qui ène zenfant li profite de so parents qui accompli tout so désirs, et lors-là li li désobeir zotte ou soit qui li alle cause causer qui pas besoin avec parents-là. ène dimoune dire “*Ouf*” quand li dans la peine. Couma mo fine dire, mo gagne beaucoup lettres de parents qui mentionne désobéissance de zotte enfants.

Zenfant besoin éna la crainte d'Allah et preserve droit de zotte mama papa. Sinon qui conner si pas zotte zotte banne enfants pas pour agir de la même façon avec zotte. Si aujourd'hui même pas arrête zotte et pas

faire zotte comprend, alors ça cercle satanique-là pour continuer aller même et pas pour arrêter. Et demain zotte banne enfants pour agir de la même façon qui zotte fine agir avec zotte parents. Qui Allah protège nous de cela. Et qui Allah faire qui générations futures de banne Ahmadis reste établi lors la religion et établi droits des autres, beaucoup plus qui banne générations passé. »

15. Comportement dans la société

Dans le Saint Coran, Allah dire dans ch 58 verset 12 :

« O banne ki croire ! Quand dire zotte « Faire place ! » dans *zotte* banne réunions, alors faire place ; et Allah pou faire place pou zotte *oussi*. Et quand dire *zotte* : «Lévé depuis *dans zotte place*, » alors lévé. Allah pou élève niveau rang banne ki croire d'entre zotte et banne ki finne recevoir connaissance. Et Allah Li Bien-Consient ça ki zotte faire. »

Dans ch 24 ver 28-29, Allah dire :

« O banne ki croire ! Pas rentre dans aucun la case ki pas zotte la case tant ki zotte pas finne demande permission et salué banne occupants *de la case*-là. Ça li meilleur pou zotte pou ki zotte mette zotte-mêmes en garde. Et si zotte pas trouve personne là-dans, alors pas rentre là-dans tant ki pas donne-zotte permission. Et si dire zotte : « Rétire-zotte » alors rétire zotte ; ça li plus pur pou zotte. Et Allah conne bien céki zotte faire. »

1. Faire salaam tous dimounes pareil ; ou pou gagne la paix. Faire discrimination, li mauvais.
2. Ou besoin demande permission trois fois avant rentre dans ène là-case ; si ou gagne permission, ou capave rentré, sinon retourné.
3. Li pas permette ki ène dimoune look dans là-case ène l'autre dimoune à moins ki ou gagne permission parce qui, guette dans là-case ène dimoune, li pareil couma rentre dans là-case là.
4. Nous besoin garde nous li-yeux baissé, (et ça li applique pou tous

les deux, filles et garçons), évite tous méchanceté et pas commette banne actions ki pou amène nous dans du feu l'enfer.

5. Quand zotte à trois seulement, faudré pas ki deux d'entre zotte causé tout seul, (et laisse troisième-là ène côté) parce ki troisième dimoune-là pou senti li blessé, à moins ki encore dimoune joine zotte.

6. Nous besoin évite compagnie de banne imbéciles, (ça surtout li applique pou banne dimounes ki perdu zotte lé-temps cause banne quittechoses inutile) faudré pas ki nous écoute zotte banne imbécilités et perdi nous lé-temps.

7. Quand nous reste dans compagnie banne mauvais dimounes, ça cultive l'avarice, l'indécence ek mauvaises manières.

8. Faire attention ki ou péna aucun mauvais compagnon car ou pou juger selon ou fréquentation.

9. Quand ou reste en compagnie de banne bon dimounes li pareil couma en compagnie d'ène vendeur de parfum, si li pas donne ou parfum-là, ou capave encore jouir de parfum-là.

10. Celui ki coupe relation avec so frère plisse ki un an, li pareil coumma dire li fine tué li. (ça hadith-là montré nous ki casse rélation avec ène frère li pareil à ène crime et nous trouvé ki pou ène oui ou non, nous péna droit coupe nous relation avec ène dimoune)

16. Prend garde à la jalousie

La jalousie et l'envie, li tellement ène zaffaire dangereux qui Allah finne révèlè ène verset dans Quran, qui nous besoin récitè pou protége nous contre la jalousie :

Surat Al-Falaq (chapitre 113 versets 2-6)

« Dire: Mo cherche refuge côte le Seigneur de l'aube, contre le mal ki Li finne créé

et contre le mal de l'obscurité quand li propagé,

et contre le mal banne ki soufflé lors banne noeuds pou *défaire* zotte et contre le mal de dimoune qui envieux quand li envié. »

La jalousie et l'envie forme partie de banne émotions ou sentiments qui plus destructive qui ène dimoune éna vis à vis so prochain. Ça banne sentiments-là faire li souhaite le mal pour les autres et content quand malchance tombe lors zotte. Le Saint Prophète^(s.a.w) ti mettre en garde contre l'envie, et li ti compare li à du feu qui complètement brûle du bois. Le Saint Prophète^(s.a.w) ti dire :

« Prend garde à la jalousie, car en vérité li détruire banne bons actions pareil coumma du feu détruire du bois. »(Abu Dawood).

La jalousie c'est ène maladie du coeur et li faire le coeur vine impure. Quand ti demande le Saint Prophète^(s.a.w) qui sanne-là banne meilleurs dimoune? Li ti réponde :

« Celui qui éna ène le coeur propre et la langue qui cause vrai. »

Zotte dire li “Nous comprend ce qui veut dire ène la langue qui cause vrai, mais qui veut dire ène le coeur propre? Li réponde : “Li ène le coeur de quelqu'un qui pieux, pure et qui péna péché, qui pas désobéir, qui pas haïr, et péna la jalousie et l'envie. » (Ibn Majah).

17. Prend garde à la jalousie

Al-Zubeir Ibn Al-Awam rapporte qui le Saint Prophète^(s.a.w) ti dire : « La maladie de banne nations finne vine côte ou; la jalousie et la haine... » (Al-Tirmidhi)

La jalousie capave faire ène dimoune plonger dans l'incroyance parce qui li faire ça dimoune-là senti qui Allah pas faire justice avec li. Li oublié tout banne grâces et bénédictions qui Allah finne envoye lors li. Le Saint Prophète^(s.a.w) dire : “Zotte ennemis de Allah So bannes bontés.”

Allah dans So sagesse absolue finne donne à certain dimoune plus de richesses, intelligence, beauté, la force, zenfants, etc. qui les autres.

Faveur d'Allah dans ça le monde-là, c'est ène test. Le plus de faveurs qui nous gagné, plus de tests nos pou gagné. Al-Hassan, al-Basri dire : « Soit content de provision de ça le monde-là, car le Plus-Miséricordieux fine honore quelques uns de So banne serviteurs plus qui les autres en terme de provision couma ène test. Celui qui fine gagne beaucoup, Allah pé tester li pou guetter si li pou reconnaissant à Allah et si li pou accomplir so devoir qui li éna concernant so l'argent. » (Ibn-Hatim)

Allah l'Exalté fine défanne nous pou désire ce qui les autres éna :

« Et pas guette avec l'envie le fait qui Allah finne faire éna parmi zotte dépasse les autres. Pou banne zommes éna ène part de ça qui zotte gagné de zotte travail, et pou banne madames éna ène part dans gain de zotte travail. Et dimanne Allah dans So grâce. En vérité, Allah Li conne bien tout quique choses. » (4 :33)

Pour décourage la jalousie, le Saint Prophète^(s.a.w) dire:

“Pas guette celui qui éna plus qui ou, mais guette celui qui plus en bas qui ou, car ça pou rappelle ou de banne faveurs qui Allah fine envoye lors ou.”(Al-Boukhari)

Ene l'autre l'occasion le Saint Prophète^(s.a.w) ti dire:

“Si quelqu'un de parmi zotte guette ène dimoune qui plus riche et mieux bâti qui li, li besoin aussi guette quelqu'un qui plus bas qui li.” (Muslim)

18. L'amitié et la fraternité

« Et rappelle Allah So faveur lor zotte quand zotte ti ennemi ène are l'autre, alors Li fine unir zotte lé-cœur dans l'affection, de sorte ki, par So grâce, zotte fine vine coumma banne frères. » (3 :104)

Le Saint Prophète^(s.a.w) fine dire :

1. Éne caractéristique de banne croyants c'est qui zotte besoin prend part dans chacun zotte malheur, pareil coumma ène mal de tête faire tout ou lé-corps faire mal.

2. Banne croyants, dans zotte sympathie, l'amour et gentillesse pareil coumma banne membres de ène seul lécorps ; si ène membre gagne douleur, c'est tout le corps qui gagne la fièvre et souffert.
3. Quand ou faire camarade avec ène dimoune, pas doute li, pas consulter les autres lor li, parce qui ou capav joine ène dimoune qui hostile envers li et li capave dire ou ène quiquechose lor li qui fausse et casse zotte l'amitié.
4. Meilleur camarade dans li-yeux Allah c'est celui qui comporte li de la meilleure façon avec so camarade.

19. Pas faire ghibat ou back biting

1. Hazrat Khalifatul Massih Awwal^(r.a) conseille nous: 'Sappe ou même de banne soupçons et **bad zani** - c'est-à-dire pense mal pour les autres. Parce qui ça pour faire ou gagne l'habitude pour rode défauts. À cause ça même qui Allah dire qui pas besoin ou espionne ou camarade. L'habitude pour espionner li vini à cause qui ou pense mal pour les autres. Quand ène dimoune pense mal pour so frère, li pour rode trouve quique défaut dans ça frère-là. Et li tellement plonger dans rode défauts de so frère comment dire li pé faire ène grand travail important. Et quand ène fois li fine présente ène mauvais l'opinion lors ène so frère, li pour rode so banne défauts, parce qui banne dimounes pour demande li preuve de ce qui li fine dire. Pour rode ça banne preuves-là, tous les temps li continuer rode défauts de so frère. Donc pour complète so **bad zani**, li espionner et ça conduire li à **ghibat**.'
2. Hazrat Khalifatul Massih Awwal^(r.a) dire: 'Magine ça bien qui ça c'est pas banne histoires ça mais c'est banne réalités. Banne dimounes qui faire **ghibat** zotte pas pour mort tant qui zotte pas tende **ghibat** lors zotte-même. Ça li d'après ène Hadith qui Hazrat Abdullah Bin Umar^(r.a) rapporter qui Hazrat Mohammad^(s.a.w) fine dire lors mimbar avec ène belle la force: 'O banne dimounes! Certains d'entre zotte apparemment Musulmans. Mais la foi pas encore enraciner dans zotte lé coeur. Mo averti zotte qui zotte pas besoin dérange banne Musulmans avec zotte mocqueries et qui zotte pas

besoin rode défauts de banne Musulmans. Sinon imagine ça bien qui ène dimoune qui rode défauts de so frère, Allah Li même Li pour tire so banne défauts et Li pour humilier li.’

3. Hazrat Mohammad^{saw} fine dire qui banne dimoune qui faire comme ça jamais pas pour rentre dans Paradis. Qui ça dimoune intelligent-là qui envie perdi paradis juste dans prend plaisir dans banne paroles futile et temporaire? Hazrat Khalifatul Massih Awwal^(ra) dire: ‘A cause ça même mo conseille ou avec douleur qui ou besoin délaisse *ghibat*. Délaisse l’ennement et l’animosité. Ça li pour dans ou propre l’avantage. Banne dimoune content plonge zotte même dans problème pour nanrien. Sinon ça affaire-là li bien facile pour quitter. Allah pas content si banne jeunes rode défauts zotte camarades et cause derrière zotte le dos lors ça. Si ou fine trouve quique défauts dans ou camarade, ou besoin faire doah pour qui Allah guide li. Imagine ça bien qui Allah Li Très-Pardonnant, Gracieux et Miséricordieux.’

4. Huzoor(a.t.b.a) dire: Pareil comment mo fine dire li avant certains dimoune cause ça banne qualité causer seulement par simple plaisir. Au commencement zotte écouter seulement et zotte rier quand zotte tanne ça banne causer-là. Et petit à petit zotte gagne l’habitude pour assise dans ça banne réunions-là et zotte même zotte commence cause ça banne qualité causer-là. Banne jeunes besoin sappe zotte de ça dès l’enfance même. Quand zotte encore Atfaal et Khuddam zotte besoin gagne ça l’habitude pour pas cause du mal lors les autres.

5. Hazrat Khalifatul Massih Awwal^(ra) dire: ‘Si ou pé approche de soupçons ou besoin quitte ça. Sinon ça pour faire ou alle rode défauts. Et si ou pé approche ça ou pour arrive près cotte *ghibat*. Et *ghibat* est ène grand défaut, et li pareil comment dire ou pé mange la chair de ou frère. Gagne crainte d’Allah assurément Allah Li Très-Pardonnant, Miséricordieux. Mais c’est seulement quand Allah pour donne ou l’occasion qui ou pour capave faire ça. À cause ça même nous besoin faire efforts pour sappe nous de tous mensonges, *ghibbat*, rode défauts qui fine répanne dans la société. Et nous

besoin reste demande l'aide d'Allah pour sappe nous de ça. C'est avec So l'aide même qui nous pour capave protège nous de ça.'

6. Hazrat Massih Ma'oud^(a.s) dire: 'Ou pas besoin faire plainte lors ou frère derrière so le dos. Est-ce qui ou ti a content pour mange la chair de ça frère-là? Donc pour faire plainte aussi c'est ène sorte de *ghibat*. Parce qui ène fois qui ou fine commence faire plainte parmi ou banne frères petit à petit ça banne plainte-là pour augmenter. Et ou pour commence cause contre ou frère derrière so le dos. C'est pourquoi qui ou besoin délaisse le moindre ti parole qui capave faire ou approche *ghibat*. Qur'an dire qui celui qui faire *Ghibat* li comment dire pé mange la chair de so frère qui fine mort. Banne madames éna ça mauvais l'habitude-là plus. Zotte assiser et cause ça banne causer-là jusqu'au milieu de la nuit. Et ensuite le matin zotte même zotte faire ça banne mauvais travail-là. Mais ou besoin sappe ou de cela.

(Extraits de Khutba Jummah 26-12-2003)

20. La reconnaissance

1. Dans Quran, Surah Ibrahim (Chapitre 14), verset 8, Allah dire :

« Et rappelle quand zotte Seigneur ti déclaré: "Si zotte reconnaissant, certainement Mo pou accorde zotte plus encore; mais si zotte ingrats, certainement Mo punition li sévère. »

2. Dans le monde islamique aujourd'hui, à part le Jama'at Ahmadiyya, personne pas conner comment Allah récompense celui qui remercier Li. Et zotte pas conner comment Li augmente So faveurs et continuer augmenter, suite à So promesse qui Li fine faire.

3. Le Jama'at fine faire doah avec Allah en toute humilité et fine demande So faveurs et So grâce, fine tombe devant Li, fine demande Li qui faire zotte reste attacher avec le Khilafat. Ça Allah qui faire plusieurs pas vers So serviteurs quand So serviteur faire ène pas vers Li, ça Allah-là fine tanne ça

doah-là et fine gagne pitié lors nous. Et Li fine guide caravane de l' Ahmadiyyat vers Li. Tous banne Ahmadi en reconnaissance envers Allah, fine prosterner pour faire So louanges. Zotte fine alle vers l' extrême de zotte fidélité et zotte fine tini ferme avec zotte promesse qui zotte pour établir le Khilafat. Allah fine augmente la pluie de So faveurs en résultat de la reconnaissance qui la Jama'at fine témoigner envers Li. Et c'est pas ène la pluie qui pour arrêter. C'est ène la pluie qui pour tomber et qui pour continuer tomber, parce qui c'est ène annonce de nous Rab qui si to pour remercier Moi, Mo pour continuer augmente Mo banne faveurs envers toi. Donc continuer ou sincérité, doah et pas arrête ça la pluie faveurs d' Allah qui fine tomber en résultat de ou reconnaissance. Qui Allah donne nous l' occasion pour marche lors l' exemple de nous Maître Hazrat Mohammad^(s.a.w).

4. Dans ène hadith Hazrat Aisha^(r.a) rapporter: "Hazrat Mohammad^(s.a.w) ti pé faire tellement longue longue namaz qui so li pied ti pé enfler et fanne. Ène fois mo fine demande li: "O Prophète D' Allah, qui faire ou mette ou même dans difficulté quand Allah fine fini pardonne tout ou manquements passé et futures?" (c'est-à-dire qui Allah fine prend la responsabilité pour protège li contre tout faute). Li fine réponne: "Est-ce qui mo pas besoin reconnaissant envers Allah pour So banne faveurs qui Li fine faire lors moi?"

5. Ça l'habitude pour remercier Allah pour So Faveurs et pour faire doah et pour chante So Louanges, li pas besoin seulement à cause de banne faveurs qui Allah fine faire lors Jama'at. Parce qui individuellement aussi et au niveau de la famille aussi Li envoie So bénédictions en résultat de reconnaissance qui fine montrer envers Li. Donc besoin continuer remercier Allah, pour ou propre bien être, progrès et bien être de ou famille et ou générations future.

6. Dans Hadith Hazrat Abdullah^(r.a) rapporter qui Hazrat Mohammad^(s.a.w) fine dire: "Celui qui faire ça doah-là le matin : "O Allah tout faveur qui mo fine gagner c'est de To-même, To péna aucun associé, et tout louange et remerciement pour To-même" – li pour comment dire fine faire tout le remerciement du jour. Et celui qui pour faire ça doah-là le soir, li aussi li pour

accompli remerciement qui li besoin envers Allah.”

7. Hazrat Abou Huraira^(r.a) rapporter qui mo fine appranne ça doah-là avec Hazrat Mohammad^(s.a.w): “O Allah donne moi l’occasion pour remercier Toi, et pour qui capave magine Toi beaucoup, et pour qui mo capave marche d’après To paroles et suivre To banne directives.”

(Extrait de Khutba Jummah 1/8/2003)

3RD TERM- SEP TO DEC

21. Étiquette quand visite ène malade

1. Quand ou visite ène malade faudré pas tardé et engage dans banne conversations inutiles et faudré pas demande banne questions pou rode conne banne détails lors so maladie, et mette li mal à l’aise.
2. Pas force ène dimoune malade pou mange beaucoup.
3. Pas pose questions lor maladie qui ène dimoune fine gagné dans so partie privé parce qui ça capave gêne li.
4. Faudré pas servi banne paroles décourageantes en présence de ène malade et so famille. Nous besoin reconforte zotte en faisant ça doah-là : « Insh’Allah, tous difficultés pour éloigné. »
5. Éna beaucoup bénédictions quand nous visite ène malade.
6. Nous besoin confirmer bien lor maladie, blessures ou la mort de ène dimoune avant qui nous informe les autres dimoune, surtout so famille.
7. Si ène dimoune souffert de ène maladie qui capave cause quique inconvéniement les autres dimoune, li besoin reste impé à l’écart.

Concernant guérison de banne maladies :

8. Si ou fine gagne ène traitement pou faire, ou besoin suivre li et en même temps faire doah qui Allah faire qui traitement-là vine bénéfique pou nous.
9. Pas servi ta’weez ou les autres superstitions parce qui c’est shirk ça, c’est-à-dire qui ou pé associé les autres quiquechoses avec Allah. De Allah-

même qui gagne tout guérison et nous besoin invoque l'attribut d'Allah, le Guérisseur (Ash-Shaafii), et demande Allah, le Gracieux, pour accorde nous ène guérison complète.

22. Les Compagnons du Saint Prophète^(s.a.w)

Hazrat Saad Bin Rabi Ansari^(r.a)

Li ti garçon de ène propriétaire de Médine. Il ti gagne ène bon l'éducation. Li ti conne lire et écrire. Li ti accepté l'islam lor la main du Saint Prophète^(s.a.w) avant so l'émigration à Médine. Plus tard li fine donne so la vie pour l'amour de l'Islam.

Quand le Saint Prophète^(s.a.w) et so banne compagnons fine quitte la Mecque pou alle Médine, banne Ansaars (Musulmans de Médine) ti accueillir zotte à bras ouverts. Chaque émigrant (Mohâjirînes : c'est-à-dire Musulman ki fine quitte la Mecque) ti vine ène frère pou ène Ansaar. (C'est ki nous comprend ici c'est ki quand banne Mecquois fine rentre dans Médine, chaque musulman de Médine fine créé ène rélation de fraternité avec ène musulman Mecquois.) A ça l'époque-là, Sa'ad^(r.a) fine donne tout so fortune pou partager.

Raconter ki dans bataille Uhud fine gagne so lécorps en bas banne cadavres. Avant so la mort, li fine dire à ène musulman ki ti vine rode li sous l'ordre du Saint Prophète^(s.a.w) : « Faire le Messenger d'Allah mo salaam ; et dire banne Ansaars ki si le Saint Prophète^(s.a.w) mort dans ça la guerre-là tandis ki zotte, zotte encore vivant, zotte pas pou capave présente zotte devant Allah, parce qui zotte fine promette à Aqâba ki zotte pou protège le Saint Prophète^(s.a.w) même au prix de zotte la vie. » Quand li encore pé dire ça-même li fine mort.

Ene fois, Sa'ad^(r.a) so ti fille fine vinne guette Hazrat Abu Bakr^(r.a). Hazrat Abu Bakr^(r.a) fine tire so manteau et fine pose en bas et fine invite ti fille-là pou assisé. Hazrat Omar^(r.a) fine demandé : « Ki sanne-là ça madame-là ? » et Hazrat Abu Bakr^(r.a) fine réponde : « C'est ti fille de Hazrat Sa'ad Bin Rabi^(r.a) et li ti meilleur ki toi et moi. » Omar^(r.a) fine étonné et li fine demandé : « O Calife du Messenger d'Allah ! Coumma ça capave possible ? » Hazrat Abu

Bakr^(r.a) fine réponne : « Sa'ad fine fini alle dans Paradis dans vivant même du Saint Prophète^(s.a.w) tandis ki nous, nous encore ici. »

23. Bannes intoxicants ou drogues

« O banne ki croire! banne intoxicants et banne jeux de hasard et *adoration* banne idoles et *z'affaire* devine la chance par moyen de banne flèches, tout ça li seulement Satan so travail malprope. Donc reste éloigné de *tout* ça pou ki zotte réussi. » (5 : 91)

Le Saint Prophète(s.a.w) fine dire :

1. Évite tous banne intoxicants ou drogues.
2. Pas consomme l'alcool parce qui c'est la clé à tous banne vices
3. Celui qui consomme l'alcool, la lumière de la foi disparaîte de so l'intérieur
4. La boisson c'est la source de tous les péchés et le plus grand des péchés.
5. Mo peuple pour tombe sous l'emprise de l'alcool après mo départ, zotte pou donne li différents noms et banne qui en autorité lor zotte pour aide et encourage zotte là-dans.
6. Tout quiquechose qui intoxiquer quand prend li dans banne grandes quantités li tout à fait défendu.

Dans so Khutba Jummah 20.08.2004, Huzour (a.t.b.a) dire

7. Dans cause causer ou camarade faire ou commence jouer, de ça façon-là ou alle tombe dans l'influence camarade. Ou bien ène tel camarade qui habituer fume cigarette, à cause ou camarade avec zotte ou commence fumer ou aussi, et aller aller ou coummence essaye les autres la drogue aussi. Donc ça banne tels dimounes qui essaye gâte ou-là, zotte vine dans catégorie de dimounes inutile. Besoin pas garde connection avec zotte. Coupe relation avec zotte.

8. C'est pourquoi rapelle bien qui ça banne dimounes-là pour faire zotte aussi cause menti. Zotte pour faire ou faire banne tels actions qui ou pour senti ou obliger cause menti. C'est pourquoi quand ça banne tels dimounes-là approche ou, rapelle bien qui shaitaan fine vine attaque ou, protège ou même. Li pour dire ou préparer pour cause menti. Si zotte vrai et envie vine vrai, ou envie protège ou même, sapper avec ça banne dimounes-là afin qui ou capave reste ferme lors la vérité.

9. H.Massih Mawood a.s dire en fait cigarette li necque ène la fumée qui detrimentrale pour nous interieur. Islam fine défanne banne affaires inutiles et ça li cause du tort même. Donc li meilleur reste proteger de ça. Donc banne dimounes qui plonger dans ça banne affaires-la zotte bisin faire efforts pour débarasse zotte de ça.

10. Dans banne pays côte ou rester-la ou pour trouve ène grande quantité de banne dimounes qui a cause cigarette zotte fine tombe dans banne les autres drogues. Lers la zotte fine perdi zotte travail, perdi zotte commerce zotte business. Zotte fine nepli éna la case et zotte la vie fine detruire. Zotte fine mette la vie de zotte madame et enfants aussi dans difficulté. Zotte même zotte pé passe zotte la vie sous banne ponts ou soi lors la rue et dans ène mauvais l'état, bien malpropre. Zotte pé talle la main are dimounes. Zotte pé choisir banne affaires dans saleté pour manger. Donc tout ça c'est à cause de ça banne affaires inutiles.

24. Respect pour les morts

« Celui Qui fine crée la mort et la vie pour qui Li testé zotte — lequel d'entre zotte qui meilleur dans conduite. Et Li-Même Qui Tout-Puissant et Qui Bien-Pardonnant. »(Le Saint Coran 67 :3)

La mort, li ène phénomène de plus naturel qui existé, parce qui li la fin de chaque être vivant. Et quand l'heure de la mort vini, ou pas pou capave sauvé avec sa décret-là, même si ou barricade ou dans banne tours bien solide.

Si réfléchi lors cycle de la vie et de la mort, pou trouvé qui sa la loi-là li applique pou tous quique chose de la nature et chaque créature vivant besoin faire face à la mort et la décomposition. Qui li s'agit de ban nations ou bien de banne individus, tous besoin faire face à ça la loi inflexible-là.

Mais seulement à propos de sa sujet-là, banne dimoune pas montré zotte trop concerné et donne même ène l'impression qui la mort laisse zotte indifférent

Allah même fine dire qui la vie de sa la monde-là, li seulement ène illusion et si ou laisse ou entraîné, ou bien ou laisse ou influencer par attractions mondaines, par exemple qui ou travail la nuit et li jour pou qui ou gagne de l'argent qui ou dépensé après, afin qui ou gagne tout le confort, le bien-être et l'amusement de sa le monde-là, alors ou finne gaspille tout ou efforts, ou la peine, ou travail et ou le temps — parce qui résultats de tous ou progrès qui ou finne faire, tout ça travail qui ou fine faire-là pou laisse toujours ène sentiment d'amertume et de déception parce qui ou fine reste privé de progrès spirituels.

Maintenant si analyse la signification de la mort dans le sens de ène étape avant la vie éternelle. Alors dans n'importe qui façon nous guette li, li ène étape bien important parce qui peut être 'la mort' en li même li bien plus important qui 'la vie lor la terre' car c'est le seul moyen qui ouvert la porte de la vie éternelle à l'homme, côte l'homme capave faire banne progrès spirituel illimité, tandis qui so la vie lor la terre ti seulement ène séjour temporaire et ène préparation pour ène la vie éternelle et permanent au-delà de la tombe.

Concernant la mort, le St. Prophète^(s.a.w) fine dire qui certainement ou pou goûte la mort et quand ça moment-là arrivé, ou pou soit dans ène situation de détresse ou bien ou pou éna ène sentiment de contentement. Le St. Prophète^(s.a.w) fine aussi dire qui quand ène dimoune mort, li né plus capave faire aucun action. Tous so travaux arrête là-même sauf :

1. La charité qui li ti faire quand li ti encore vivant : alors ça charité-là pour ène source de bénédiction continueuse pour li.
2. Ou bien qui si sa dimoune-là fine partage la connaissance qui Allah fine donne li avec les autres et ti enseigne banne les autres certain enseignements à travers lesquels, banne qui fine appranne-là gagne certain l'avantage. A ce moment-là ça action-là pou vine ène source de bénédiction continueuse pou li.
3. Après si le défunt éna banne enfant pieux et qui faire doah pou li, alors à ce moment-là ça aussi pou vine ène source de bénédiction continueuse pou li.

Si jamais éna ène conversation concernant ène dimoune qui fine mort, besoin raconte banne bon quique chose, cause bon causé lors li et évite pour cause ban mauvais quique chose ou bien ban mauvais causé lor li parce qui ou pou blesse so banne familles qui encore vivant.

Faudrait pas assise lor ban tombes, ni faire face avec zotte quand zot faire Namaz.

Le Saint Prophète^(s.a.w) fine aussi dire qui celui qui joine ène procession funèbre et aide pou apporte le janaza à trois reprises, c'est-à-dire trois fois pendant le trajet, fine réussi rempli so obligation envers le défunt.

Ene jour ti éna ène procession funèbre qui ti pé passé et le Saint Prophète^(s.a.w) fine debouté tout de suite. Quand banne compagnons qui ti avec le Saint Prophète^(s.a.w) fine trouve sa, zotte aussi zotte fine faire pareil, mais en même temps, ène parmi zotte fine dire: «O Prophète d'Allah! Ça c'est le janaza de ène madame juive. » Alors le Saint Prophète^(s.a.w) fine dire : «La mort c'est ène quique chose de chagrinant et qui faire gagne peur, donc n'importe quand zotte trouve ène procession funèbre passé, zotte besoin deboute en signe de respect. »

25. Respect pour les morts

Ce qui Hazrat Massih Maoud^(a.s) fine dire à propos de la mort et les morts.

01 Fatiha : Ti demande point de vue de Hazrat Massih Maoud^(a.s) lors cérémonie de Fatiha qui faire pou demande pardon pour ène dimoune quelques jours après so la mort.

Huzur^(a.s) ti dire qui d'après so observation dans de tels circonstances quand banne dimoune réunis, zotte engage zotte dans banne conversations inutile et faire le 'badzani'. Mais si jette ène coup d'œil à l'époque du Saint Prophète^(s.a.w), jamais le Saint Prophète^(s.a.w) ou so banne compagnons ou les autres grand Imams après fine faire de telle chose. Qui faire nous maintenant, nous besoin ouvert ène la porte pou faire banne innovations. Pas éna aucun utilité pou faire ça, défanne pou faire de telle action.

02 Janaza Ghaïb : Huzur^(a.s) fine dire qui: «Banne qui pas fine gagne l'occasion d'assister Namaz Janaza de quelqu'un, alors ça dimoune-là capave prié dans so propre la case et demande pardon pou qui Allah pardonne péché de dimoune qui fine mort-là ou bien si ou envie ou capave faire le Namaz Janaza Ghaïb.

03 Duah pour les décédés : ène fois ène dimoune ti demande à Hazrat Massih Maoud^(a.s) qui doah besoin faire quand visite ène cimetièr, c'est-à-dire qui doah faire lors tombe de quelqu'un; et Hazrat Massih Maoud^(a.s) ti dire qui besoin faire doah pour la personne décédé afin qui Allah pardonne li péchés qui li fine faire dans ça le monde-là et besoin aussi faire doah pou so famille endeuillé.

04 A propos de la lecture du Quran pour le défunt : Hazrat Massih Maoud^(a.s) dire quand donne sadqa ou faire la charité au nom d'une personne décédé, Allah donne la personne so récompense, mais en ce qu'il s'agit de faire la lecture du Quran shariff au nom de ène personne décédé, jamais fine mentionne ça sujet-là à aucun moment dans la vie du Saint Prophète^(s.a.w). Donc pas éna aucun preuve lor ça sujet-là. Au lieu de faire de tels choses, li ti pou meilleur si ti faire la charité en son nom et faire doah pou li, et ça li le

meilleur des pratiques. Mais meilleure charité qui capave faire, c'est quand quelqu'un faire li avec so propre la main et quand li encore vivant — parce qui en faisant ça li montré qui li éna la foi.

05 A propos de Janaza de ène Ahmadi qui banne opposants refusé pou faire.

Au cours de ène conversation concernant situations dans certaines région côte éna seulement ène famille Ahmadi et côte le reste de banne habitants oppresse et persécute ça famille Ahmadi-là, et traite zotte de kafirs. Banne oppresseurs ti pé même déclaré qui si arrivé quelqu'un mort dans ça famille-là zotte pas pou faire le Namaz Janaza. Qui pou arrivé dans ène telle situation ? Hazrat Massih Maoud^(a.s) ti arrivé entende ça conversation-là par coïncidence, et fine dire: «Qui ène Ahmadi capave gagné par Namaz Janaza qui fine offert par de tel opposants? Le namaz Janaza, li ène la prière ça et Allah jamais pas accepté la prière de ceux qui sous So colère. En ce qui concerne Namaz Janaza de ça Ahmadi 'Shahid' -là, c'est banne anges qui pou offert so Namaz Janaza. Ou besoin pas prend compte ça qualité opposants-là, et ou besoin éna confiance en Allah. »

26. Bonne compagnie

1. Dans Quran, Surah Al Taubah chapitre 9, Allah dire : 'O zotte qui fine croire ! Craigne Allah et soyez parmi banne véridiques.'

2. Dans ène l'autre place dans Qur'an Allah dire qui banne dimounes qui fine prend mauvais camarade pour dire: 'Malheur à moi, si seulement mo pas ti prend untel pour camarade. Li fine égare moi du Rappel d'Allah, après qui mo fine gagne ça Rappel la. Et Satan li déserte l'homme, ène fois qui li fine mette li dans tentation.' (Al Fourqaan: 29-30)

3. Concernant cela, Hazrat Mousleh Ma'oud(r.a) dire: Après cela Allah fine mentionne banne raisons qui faire la destruction descende lors banne dimounes. Allah dire qui tout le temps, l'homme li alle détruire à cause de so

mauvaise compagnie. Tout d'abord li montrer ène grand fierté, à cause de so banne camarades, mais quand ène malheur frappe li, c'est là qui, involontairement li dire : « A! si seulement mo pas ti prend untel pour camarade, parce qui li fine égare moi. » C'est à cause de ça même qui Qur'an fine spécialement conseille banne croyants, qui zotte besoin reste avec banne véridiques. C'est à dire, qui 'O banne croyants! Tout les temps zotte besoin reste assise avec banne véridiques.'

4. Hazrat Mousleh Ma'oud(r.a) dire: 'En vérité ène dimoune pas pour capave reste dans ène place sans qui li influencer par so l'environnement. Quand li pour choisir banne dimoune qui éna haute qualités moral comme camarade, alors obligatoirement li pour faire efforts pour éloigne so banne propre faiblesses. Et petit à petit, ça banne pas qui li pour faire-là pour amène li vers banne haute qualités moral. Mais quand li pour choisir banne mauvais camarade, alors jamais ça banne dimoune-là pas pour amène li lors le droit chemin. Au contraire, zotte pour faire li tombe dans banne bassesses immoral.'

5. Hazrat Mousleh Ma'oud(r.a) fine donne ène l'exemple. Li dire qui ti éna ène étudiant qui ti éna ène grand croyance dans la véracité de Hazrat Massih Ma'oud(a.s). Ça étudiant-là fine écrire Hazrat Massih Ma'oud(a.s) et fine dire li: 'Au commencement, mo ti éna ène grand certitude lors Bon Dieu, mais maintenant mo fine commence gagne banne doutes.' Hazrat Massih Ma'oud(a.s) fine réponde li: 'Parmi ou banne camarades, besoin éna ène dimoune qui éna banne pensées athéiste, et ça pé faire l'effet lors ou. A cause de ça même qui ou besoin change ou place.' Donc ça étudiant-là fine change place côte li assiser, et li fine reformer par li-même. Hazrat Mousleh Ma'oud(r.a) dire: à travers ça nous capave comprend comment banne mauvais l'effet capave influence ène dimoune. C'est à cause de ça même sagesse-là, qui quand Hazrat Mohammad(s.a.w) ti pé assiser dans ène reunion, tous le temps li ti pé reste faire beaucoup istighfaar même, afin qui aucun mauvais pensée de ène l'autre dimoune pas influence so le coeur pure.'

6. Ensuite éna ène hadice qui bien important, lors laquelle banne parent et banne enfant qui pé rentre dans la jeunesse besoin porte ène grand attention. Hazrat Abou Huraira(r.a) rapporter qui Hazrat Mohammad(s.a.w) fine dire: ‘Ène dimoune li suivre le pas de so camarade — c’est-à-dire : qualité morale de so camarade pour influence li — à cause de ça même qui li besoin guetter avec qui sanne-là qui li pé faire camaraderie.’

(Extraits de Khutba Jummah 11_06_2004)

27. Les compagnons de Hazrat Mohammad^(s.a.w)

Hazrat Salman Farsi^(r.a)

Salman Farsi^(r.a) ti ène dimoune de la Perse. Avant, li ti ène Chrétien et li ti pé vivre parmi banne prêtres. ène prêtre fine dire li qui pou éna ène Prophète ki pou prend naissance dans l’ Arabie. Salma fine donc quitte la Perse dans ène caravane pou li alle à la recherche de la vérité. Mais banne dimoune dans caravane-là fine embête li et fine vende li coumma esclave à banne Juifs ki fine amène li à Médine côte li fine accepter Islam. Salman^(r.a) fine alors reste, jour et nuit, avec le Saint Prophète^(s.a.w).

Quand banne infidèles de la Mecque fine persuade banne tribus arabe pour joine are zotte pou attaque Médine, Salman^(r.a) fine conseille le Saint Prophète^(s.a.w) pou fouille ène tranchée (canal vide) tout autour de Médine. Alors fine fouille ène tranchée qui fine empêche banne ennemis pou rentre dans Médine et finalement banne Musulmans fine gagne ça bataille du Tranchée-là qui ti appelle bataille ‘Khandaq’.

Ene fois, Salman^(r.a) ti en compagnie du Saint Prophète^(s.a.w) quand banne versets Sourate Jummah ti fine révéle côte ti pé cause lor banne **Akharines** (banne compagnons de l’avenir / du futur). ène compagnon fine demande le Saint Prophète^(s.a.w) ki sanne-là ki banne **Akharines**, banne compagnons qui supposé vine joine banne premier groupe de compagnons de l’époque du Saint Prophète^(s.a.w) ? Le Saint Prophète^(s.a.w) fine reste tranquille. Li fine repose question-là le Saint Prophète^(s.a.w) et le Prophète^(s.a.w) fine reste tranquille encore

ène fois. Li fine ré-démande le Saint Prophète^(s.a.w) ène troisième fois et ler-
là le Saint Prophète^(s.a.w) fine pose so la main lor zépaule de Salman Farsi^(r.a)
et fine dire : « Quand la foi pou monte aux Pléiades (parmi banne zétoiles)
c'est-à-dire quand la foi pou disparaîte, ène dimoune de parmi banne-là
(banne persans) pou ramène li. » Le Saint Prophète^(s.a.w) ti oulé dire ki banne
ki pou accepté ça dimoune-là pou banne *Akharines*.

Ça prophétie-là fine accompli par la venue du Messie Promis Hazrat
Ahmad^(a.s) de Qadian ki ti ène descendant de banne persans. Et so banne
compagnons qui fine accepté li zotte banne *Akharines*.

28. Amânat ou confiance

« Si ène parmi zotte, confié ène l' autre ène quiquechose, alors dimoune ki
pé garde ça quiquechose ki fine confié li-là, li besoin retourne li à l' autre
dimoune-là. Et li besoin craigne Allah Ki so Seigneur. » (2 :284)

« Et ki veille lor banne dépôts ki fine confié zotte et ki veille lor zotte
engagements... » (23 : 9)

Parfois ou prend ène emprunt li capave en forme d' argent ou ène objet. Çà
genre de transaction-là nous appelle li *amânat* : ène confiance ou ène deposit
qui concerne deux parties. Quand nous fine prend ène loan, qui li en argent
ou autre chose, nous besoin rende li avec honnêteté à la personne ki fine
faire ou confiance. Ceci li aussi valable pou ène quitchose qui pas fine
emprunter mais qui ène dimoune fine faire ou confiance pou garder.

Et pou terminer voici ène ti anecdote dans la vie du Messie Promis(a.s). Ene
matin le Messie(a.s) ti alle faire ène la marche avec quelques personnes et le
Mousleh Ma'oud(r.a) ti avec li. En chemin le Mousleh Ma'oud(r.a) finne
donne so papa, ça veut dire le Messie Promis(a.s) quelques objets banal
sans importance pou li garder. Alors le Messie Promis(a.s) fine garde ça
dans so poche. Plus tard so madame dire li pas conner qui ou fine garde
dans ou poche et mo pé alle jette ça banne objets-là. Le Messie Promis(a.s)

fine arrête li et dire : « non ça c'est Bashiruddin Mahmood Ahmad qui fine donne moi pou garder, li comma dire mo pé garde so ammânat, mo besoin rende li so banne objets. »

HADITHS

- 1 Retourne so quiquechose à celui qui fine confier ou ène quiquechose et pas trompe celui qui fine trompe ou.
- 2 Quand ène dimoune dire ou ène quiquechose qui li pas ti pou content ou répété, ça quiquechose-là considéré comme ène *amânat* même si li pas fine dire li.
- 3 Quand ou fine prend ène dimoune so l'opinion lors quelques sujets, ça dimoune qui ou fine consulter-là vine comme ène dimoune qui fine garde ène *amânat* pour ou.
- 4 Demande ène dimoune sage pou guide ou et ou pou bien guidé mais pas rejette so conseil car ou pou regretter.
- 5 Le jour du jugement dernier tout trompeur pou éna ène marque pou capave reconnaître li.
- 6 Servi ou la terre comma ène quiquechose qui fine confier à ou, et jouir so banne produits.

29. La Patience

1. Dans Quran, chapitre 2 verset 154, Allah dire: 'O banne croyants, cherche l'aide d'Allah avec la patience et avec la prière. Assurément Allah Li avec banne qui persévéré avec patience.'
2. Quand ène dimoune établi li même lors la patience, pour éna ène changement complet dans so la vie privé et la vie sociale. Mais comment est-ce qui pour montrer ça patience-là? Tous les jours éna banne situations qui vine tester la patience de l'homme. Éna toutes sortes de douleur, problème, tracas ou soi tristesse qui frappe ène dimoune, même si ça banne problèmes-

là capave tipti. Ça verset-là pé dire qui, quand ou pour tombe dans banne telle situations, c'est seulement Allah qui pour capave éloigne ou douleur, tracas et tristesse. à cause ça même qui, ou besoin reste courber devant Li et adresse Li ou banne doah, afin qui Li capave éloigne ou douleur. Mais Li pour accepter ou doah seulement quand ou pas faire aucun complainte et lamenter. Et quand ou pas alle plaigne avec banne dimounes, mais qui tous les temps ou montrer de la patience.

3. Dans hadith, Hazrat Mohammad(s.a.w) fine dire: 'C'est Allah même qui éna plus patience et qui supporte tous mauvais causés qui Li capave tender.' Péna personne qui plus patient qui Allah. Parce qui banne dimounes associer banne partenaires avec Allah et zotte donne Li ène garçon. Mais malgré ça, Allah donne zotte zotte provisions et Li protège zotte.

4. Hazrat Suhaib^{ra} rapporter qui Hazrat Mohammad(s.a.w) fine dire: « Banne affaires d'ène croyant li bien étonnant. Tous so banne affaires basé lors le bien être. Et c'est seulement ène croyant qui gagne ça stage-là. Si quelque chose de bon arrive li, li remercier Allah. Donc grâce à ça, li pour gagne banne faveurs d'Allah. Et si arrive li quelque chose de mal, li patient et ça aussi pour faire gagne banne faveurs d'Allah. »

5. Hazrat Abou Said Khudri^{ra} et Hazrat Abou Huraira^{ra} rapporter qui Hazrat Mohammad(s.a.w) fine dire: 'En résultat de tout fatigue, maladie, tracasserie, problème et tristesse qui capave touche ène musulman ou soi même si ène piquant pique li, Allah pour pardonne li certains de so banne péchés.' Ça li ène avertissement pour banne dimounes qui montrer la moindre impatience lors banne tipti difficultés. Si zotte pour montrer de l'impatience et qui zotte pour lamenter, zotte pour perdu banne l'occasions pour qui Allah pardonne zotte péché.

6. Mais en même temps, ça pé donne ène très bonne nouvelle à banne qui montré de la patience. Si ou montrer la moindre patience, Allah pas pour laisse ça l'occasion-là alle dans vide. Allah pas pour laisse ça passer sans qui Li récompense ou. Et Li pour pardonne ou banne manquements et péchés.

7. Certains dimoune commence la guerre, dès qui zotte fine tanne moindre parole de quiquène. Parfois dans banne réunion du Jama'at même zotte la guerre. Et zotte gête la sainteté de ça réunion-là. Zotte péna la moindre patience et persévérance. Alors qui fine conseille ène croyant fermement qui li besoin montrer de la patience et persévérance.

(Extraits de Khutba Jummah 13-02-2004)

30. Écrire à Huzour Aqdas(a.t.b.a)

Tous banne zenfants Ahmadi besoin écrire Huzour Aqdas souvent et demande Huzour Aqdas pour faire doah pour zotte. Nous pas besoin attanne absolument qui nous éna l'examen pour qui nous écrire Huzour Aqdas ; mais nous besoin faire li ène l'habitude. Nous besoin aussi dans nous lettre demande Huzour Aqdas faire doah pour tout banne zenfants du monde entier pour qui zotte gagne protection d'Allah contre banne mauvais quittechoses qui passé dans le monde. Nous besoin demande Huzour Aqdas faire doah pour nous banne parents, nous banne frères, sœurs, camarades, parents proches, banne qui malades, etc. Nous pas besoin écrire beaucoup mais quelques lignes pour suffit.

HADITHS: DIRES DU ST PROPHÈTE(S.A.W)

1ST TERM

1. Penser avant agir

Agir sans penser mène à banne querelles. (*Chehl Ahadith*)

Ene dimoune li pas éna aucaine contrôle lor banne mots, ène fois qui zotte ine fini sorti dépi dans so la bouche. C'est pou ça qui nous bizin penser avant nous agir. En plus, banne paroles bref et bon couvert tous banne défauts qui capave éna dans paroles qui dimoune-là fine dire. Ene l'autre Hadith lor ça sujet-là même dire: "*Banne paroles courte et banne paroles modeste, c'est deux caractéristiques de la foi.*" Le St-Coran dire: « *Et cause banne bon paroles are dimounes.* » (2:84)

2. L'amour pour le St Prophète(saw)

Personne d'entre zotte pa capave vinne ène vrai croyant sauf si li content moi plus qui so banne parents, zenfants et tous banne dimounes ensemble. (*Bukhari, Vol.I, Kitabul Eeman*)

Le St Prophète(saw), li le plus grand bienfaiteur de l'humanité parce qui li fine établi ène système permanent pou nous bien-être spirituel. Alors en retour, nous bizin content li bien plus qui nous parents, zenfants et camarades. (9:24)

Li important qui nous connait qui l'amour qui nous éna pou le St Prophète(saw), li pou nous propre bien-être; ça l'amour-là li pou faire nous gagne l'amour d'Allah. Li ouvert la porte de ène progrès spirituel qui pas éna limite pou banne croyants. (3:32, 4:70)

Ene l'exemple vivant de ça fait-là li trouve dans la personne du Messie Promis(as), qui d'après so banne propre paroles, ine arrive à grand statut de Messie Promis juste à cause l'amour immense qui li ti éna pour le St Prophète(saw).

(*Roohani Khazaa'in, Vol I, Braheen-I-Ahmadiyya, p.598*)

2ND TERM

3. Trois actions nobles.

Visite banne malades, nourri banne qui faim et libère banne esclaves. (*Bukhari*).

Ça Hadith-là mette l'emphase lor le besoin pou soulage banne dimounes qui pé souffert de ça trois types de problèmes-là. Ene dimoune malade, souvent li senti li seul avec so douleur. Si ou rende li ène visite, ça pou diverti li et li pou senti li heureux. L'ordre pou nourrit banne qui faim et pou libère banne qui pé souffert de l'esclavage paraîte dans le Qur'an (90:13-17). Ça banne vertus-là, zotte classifiés comme banne plus haute accomplissements.

4. Droits de banne voisins

Celui qui croire en Allah et au Jour du Jugement bizin pas faire du mal à so voisin. (*Bukhari*).

Haute statut qui banne voisins éna et l'emphase qui fine metté lor bon traitement de banne voisins li telle qui li fine mentionné juste après qui fine mentionne l'ordre pou croire dans Allah et dans l'Au-Delà. Dans le Qur'an aussi, ça l'ordre fine mentionné peu après l'ordre pou prier Allah et pou évite associer les autres dieux avec Li (4:37). Ça indique ça Hadith-là so l'importance.

3RD TERM

5. Soyez le premier pou faire salaam.

Allah préfère banne qui pressé pou faire salaam à banne les autres en premier (c'est-à-dire faire “*Assalamu ‘alaikum*”). (*Abu Dawood*)

Quand nous joine ène l'autre musulman, l'expression plus vertueux pou saluer li c'est dire : « *Assalamou `alaikoum – que la paix soit sur vous.* » Le Saint Coran demande nous pou dépasse nous prochain dans faire banne bonnes actions (2:149). Donc, si ène musulman essaye faire de façon qui li le premier pou dire ‘*Assalamou `alaikoum*’, c.à.d avant l'autre dimoune-là, li capave gagne le plaisir d'Allah et vinne plus proche avec Li.

Ene fois, quiquène fine demande le Saint Prophète(s.a.w):” Qui sanne-là bizin dire ‘*Assalamou `alaikoum*’ quand deux dimoune joine?” Li fine réponne: “Celui qui plus près avec Allah.” Ça veut dire qui quand nous essaye dire ‘*Assalamou `alaikoum*’ en premier, nous rapproche nous avec Allah.

6. Pas gagne droit prend aucun intoxicants

Si ène grand dose de ène quiquechose cause intoxication, ça quiquechose-là, li interdit même en petite quantité. (*Abu Dawood*).

Ça Hadith-là attire nous l'attention lor trois points important. Premièrement qui tous types d'intoxicants interdits pou banne musulmans. Deuxièmement, si ène grand dose de ène

quiquechose li cause intoxication, même ène petit dose de ça quiquechose-là li interdit. Troisièmement, ène vraie méthode pou exterminer ça type de mauvais l'habitude-là c'est pou attaque li dès so racine. Le Saint Coran (2:220) dire nous : « *Dans tout les deux éna ène grand péché ek banne avantages pou dimounes. Mais zotte côté péché li pli grand ki zot l'avantages.* » Donc le Saint Coran fine conseille nous qui péché et du mal qui éna dans ça banne quiquechoses-là zotte dépasse so banne bénéfiques. Banne intoxicants inclure l'alcool, la drogue, cigarette, etc.

Dans Qur'an, Allah dire :

« *O banne ki croire! banne intoxicants et banne jeux de chance et adoration banne idoles et zaffaires devine la chance par moyen de flèches, tout ça li seulement Satan so travail malpropre. Donc reste éloigné are tout ça pou ki zotte reussi.* » (5:91)

«*Satan li seulement désire créé l'ennementé et la haine parmi zotte par moyen banne intoxicants et banne jeux de hasard et li seulement désire détourne zotte depuis magine Allah* ». (5:92).

MALFOOZAAT: LES DIRES DU MESSIE PROMIS(A.S)

1ST TERM

NAMAZ ET LA FOI

1. Le Journal Al-Hakam du 31 mars 1903, rapporté ki le Messie Promis(a.s) fine dire : Celui ki abandonne namaz li abandonne la foi (la religion). So relation avec Allah vine faible. C'est ène fait ki depuis ki banne musulmans fine abandonne namaz, ou bien nous capave dire, depuis ki zotte fine commence faire namaz sans aucun l'amour (sans aucun goût) et sans prend compte so signification, l'islam fine commence détérioré. Quand banne musulmans ti pé faire namaz avec tout zotte lécoeur, l'islam ti conquérir presque le monde entier. Mais quand zotte fine délaisse namaz, zotte aussi zotte fine délaissé. Hazrat Ahmad(a.s) dire : Mo fine faire l'expérience plusieurs fois ki n'importe quand mo dans difficulté et mo deboute pou namaz pou demande Allah enlève ça difficulté-là, avant qui mo fini mo namaz mo trouvé ki ça difficulté-là fine enlevé ou bien ki fine gagne ène solution à ça problème-là.

Qu : Qui fine arrive banne musulmans quand zotte fine délaisse namaz ?

Allah fine délaissé zotte et doucement doucement zotte fine éloigné du vrai islam.

LE SAINT CORAN

2. Hazrat Ahmad(a.s) dire : Le Saint Coran li ène boîte à trésor mais éna bien peu de personnes ki conne sa.

(Malfouzat vol. 2, p 344)

Hazrat Ahmad(a.s) dire : Le Saint Coran li tellement glorieux ki narien pas capave dépasse li dans la gloire. Li Al-Hakam, celui ki so jugement li final, li Mohammad, c'est-à-dire, tout guide renfermé là-dans. Là-dans éna tout argument ki ène dimoune besoin. C'est ça livre-là ki finne donne ène défaite sévère à banne ennemis puissant. Ene livre ki couvert tout quittechose en profondeur et ki contenir banne nouvelles lor ça ki ti

éna avant et lor ça ki pou vini plus devant. Mensonge pas capave attaque li ni par devant ni par derrière. Li vrai la lumière BonDieu Tout-Puissant. (*Khutba ilhamiya p 59*)

Qu : Ki veut dire attribut d'Allah Al-Hakam ?

Celui ki So jugement li final, c'est-à-dire, qui banne enseignements et banne l'ordres du Saint Coran ki Allah fine donné, zotte final et pas pou éna aucun changement là-dans.

2ND TERM

NAMAZ TAHAJJUD ET NAMAZ ISTIKARA

3. Le 22 mars 1902 le Messie Promis(a.s) fine dire : Mo communauté besoin faire ène devoir faire namaz Tahajjud, même si seulement deux rakaats. C'est ène fait ki le tahajjud donne ène bon l'occasion pou supplié Allah. Banne supplications à ça l'heure-là li éna beaucoup l'effet parce qui zotte vine réellement du fond du cœur. Ou conné ki, à moins ki nous ressenti ène zèle pour namaz, li pas facile pou lévé ça l'heure-là et abandonne ou bon sommeil. Le fait même ki ou lévé ça l'heure-là créé ène zèle pou namaz et li rende nous lécoeur sensible et c'est ça condition-là ki besoin pou faire ou namaz vine efficace. Le Saint Prophète(s.a.w) ti habitué faire 8 rakaats Nafil et 3 rakaats Witar. Quelques fois li ti pé faire tout le namaz ène seul trait. Parfois li ti pé faire 2 rakaats et puis li alle dormi, puis li ré-lévé et faire encore 2 rakaats, ainsi de suite jusqu'à ki li complète tout le namaz Tahajjud. Si ène dimoune, parce qui li malade ou pou ène l'autre raison, li pas capave faire namaz Tahajjud li besoin lévé ça l'heure-là et demande pardon en lisant le Istighfar et li besoin aussi lire Daroud et Surah Fatiha.

Qu : Ki l'heure besoin faire namaz tahajjud ?

Après minuit jusqu'à avant Azhan pour le namaz Fajr.

Qu : Est-ce qui namaz Tahajjud li obligatoire ?

Non, li pas obligatoire, mais li recommandé par Allah dans le Saint Coran comme ène moyen pour rapproche de Li.

4. Le 8 juin 1907, le Messie Promis(a.s) fine dire ki de nos jours banne musulmans fine abandonne la pratique de namaz Istikhara, alors ki Hazrat Mohammad(s.a.w) ti habitué faire Istikara pour tous quittechoses. Avant banne musulmans pieux ti pé pratique li. (...) Maintenant banne dimounes dépanne toujours lor zotte connaissance pour commence faire tout quittechoses ki zotte éna pou faire. Le résultat c'est ki zotte pas réussi dans zotte entreprises pour banne raisons ki au-dessus de zotte compréhension et zotte besoin subir banne pertes.

Dans Badr 13 juin 1907 Hazrat Ahmad(a.s) dire ki à travers Istikhara nous gagne ène intelligence ki correctement guidé et aide nous pour gagne le succès.

Qu : Ki namaz besoin lire quand ou éna ène décision important pou prend ?

Namaz Istikara.

Qu : Combien de rakaats éna dans ça namaz-là et qui éna de particulier dans ça namaz-là ?

Ça namaz-la faire quand nous pé recherche l'aide d'Allah quand nous faire ène travail important. C'est ène namaz qui éna deux rakaats. Dans premier rakaat, après Surah Fatiha nous besoin lire surah Al-Kafiroune. Dans deuxième rakaats, nous besoin lire Surah Ikhlaas. Nous éna ène doah spécial pour lire qui trouve dans la Prière Musulmane page 47 et nous capave lire li dans n'importe lequel de ça deux rakaats-là.

3RD TERM

BONTÉ ENVERS L'HUMANITÉ

5.(a) Hazrat Ahmad(a.s) dire : Principe ki nous suivre c'est ki nous éna bonté dans nous lécoeur pou tout l'humanité. Si ène dimoune li trouve la case ène Hindou prend difé et li pas alle aide pou éteindre ça du feu-là, mo déclaré ki li pas appartenir à moi. Si ène dimoune dans mo banne suivant trouve quelqu'un pé rode tué ène Chrétien et li pas faire démarche

pou sappe li, mo déclaré ki li pas forme parti avec nous (c'est-à-dire dans nous jama'at)

(Rouhani Khazain vol. 12 p 28 Siradjoune Mounir p 26)

(b) Hazrat Ahmad(a.s) dire : Mo dire tous banne Musulmans, Chrétiens, Hindous et Arya, ki mo péna aucun ennemi dans le monde. Mo content l'humanité pareil couma ène maman content so zenfants. Plus même ki sa. Mo seulement ennemi pou banne fausses doctrines ki tué la vérité. Sympathie pour dimoune c'est ça mo tracas. Mo principe c'est ki mo mette de côté le mensonge. Mo rejette l'incroyance, du mal, mauvais conduite, l'injustice et l'immoralité.

(Rouhani Khazain vol.17, Arbaine part 1 p 2)

CROYANCE DANS TOUS LES PROPHÈTES

6. Hazrat Ahmad(a.s) dire : ça li ène pratique bien attirant et ki amène la paix. Li fourni nous ène moyen pou amène réconciliation parmi banne nations et li encourage ène meilleur conduite moral. Ça principe-là enseigne nous pou croire dans la vérité de tous banne Prophètes quand même ki côté zotte finne paraîte – ki li dans l'Inde, ou dans la Perse, ou dans la Chine ou dans n'importe ki les autres pays, et pou lesquels Bon Dieu fine rempli lécoeur de banne million dimounes avec la peur et grand respect et fine faire zotte religion bien établi.

(Rouhani Khazain vol. 12 p 259, Tohfa Qaisariya p 7)

Qu : Ki banne Prophètes ki fine vini parmi banne les autres peuples ?

Krishna(a.s), Bouddha(a.s), Confucius(a.s), Ramachandra(a.s), Moïse(a.s), Zoroastre(a.s), Lout (a.s), Luqman(a.s), Jésus(a.s), David(a.s), Salomon(a.s), etc.

نصرتِ الہی

(منقول از براہین احمدیہ حصہ دوم ص ۱۱۱ مطبوعہ ۱۹۸۷ء)

خدا کے پاک لوگوں کو خدا سے نصرت آتی ہے
جب آتی ہے تو سچے عالم کو ایک عالم دکھاتی ہے
وہ بنتی ہے ہوا اور ہر خسِ رہ کو اڑاتی ہے
وہ ہو جاتی ہے آگ اور ہر مخالف کو جلاتی ہے
کبھی وہ خاک ہو کر دشمنوں کے سر پہ پڑتی ہے
کبھی ہو کر وہ پانی ان پہ اک طوفان لاتی ہے
غرض رکتے نہیں ہرگز خدا کے کام بندوں سے
بھلا خالق کے آگے خلق کی کچھ پیش جاتی ہے

Nusrat-i-Ilaahi

Khouda ké paak logon ko Khouda sé nousrat aati ha
Jab aati hai to p-hirr aalam ko ik aalam dikhaati hai
Wo banti hai hawa aurr harr khassérah ko ourraati hai
Wo ho jaati hai aag aurr harr moukhaalif ko jalaati hai
Kabhi wo khaak ho karr doushmanon ké sarr pé parrti hai
Kabhi ho karr wo paani oune pé ik toofaan laati hai
Gharaz roukté nahigne harrguiz Khouda ké kaam bandon sé
Bhalaa Khaaliq ké aagué khalk ki koutch pésh jaati hai

La Victoire Divine

Dans ce poème, publié en 1880 dans le deuxième volume de son livre 'Barâhine-i- Ahmadiyya', le Messie Promis(a.s) explique que Dieu n'abandonne jamais Ses vrais serviteurs et qu'Il les aide toujours.

Traduction

- Le secours de Dieu vient aux gens justes.
- Lorsqu'il vient, il laisse voir au monde un univers miraculeux.
- Il vient tel un ouragan et enlève tout obstacle de la voie.
- Parfois il vient tel un feu pour consumer tout adversaire ;
- Ou bien il se transforme en poussière qui tombe sur la tête des ennemis.
- Parfois il se mue en tourbillon d'eau pour les engloutir.
- En somme les œuvres de Dieu ne peuvent être contrecarrées par les desseins de l'homme,
- Car quel pouvoir les choses créées peuvent-elles detenir face à la puissance de Dieu ?